

*«Қазақстан Республикасының кейбір заңнамалық актілеріне мемлекеттік қызметтер көрсету мәселелері бойынша өзгерістер мен толықтырулар енгізу туралы» заң жобасы бойынша*  
**ҚР Ұлттық экономика бірінші вице-министрі**  
**М. Құсайыновтың сөз сөйлеуі**

**Құрметті Депутаттар!**

**2-слайд**

Сіздердің назарларыңызға ұсынылып отырған «Қазақстан Республикасының кейбір заңнамалық актілеріне мемлекеттік қызметтер көрсету мәселелері бойынша өзгерістер мен толықтырулар енгізу туралы» Заң жобасы ҚР Үкіметінің Заң жобалау жұмыстарының 2015 жылға арналған жоспарының 25-тармағын орындау үшін әзірленді.

Заң жобасы Қазақстан Республикасының: «Мемлекеттік көрсетілетін қызметтер туралы», «Рұқсаттар және хабарламалар туралы», «Өсімдіктерді қорғау туралы», «Геодезия және картография туралы», «Қазақстан Республикасының Мемлекеттік шекарасы туралы» сияқты заңнамалық актілеріне өзгерістер мен толықтырулар енгізуді көздейді.

**3-слайд**

Заң жобасының негізгі мақсаты көрсетілетін қызметті алушылардың құқықтары мен заңды мүдделерін қорғауды ескере отырып, мемлекеттік қызметтер көрсету жүйесін жетілдіру болып табылады.

Қазақстан Республикасының Конституциясына сәйкес адамның және азаматтың құқықтары мен бостандықтары конституциялық құрылысты қорғау, қоғамдық тәртіпті, адамның құқықтары мен бостандықтарын, халықтың денсаулығы мен имандылығын сақтау мақсатына қажетті шамада ғана және тек заңмен шектелуі мүмкін.

Осыған байланысты, «Мемлекеттік көрсетілетін қызметтер туралы» Қазақстан Республикасының Заңында мемлекеттік қызметтерді көрсетуден бас тартуға арналған негіздер Қазақстан Республикасының заңдары деңгейінде белгіленетіні айқындалған.

Сонымен бірге, мемлекеттік қызметтер көрсету процесін реттейтін ҚР заңнамасын түгендеудің қорытындысы бойынша бірқатар мемлекеттік көрсетілетін қызметтер бойынша оларды көрсетуден бас тартуға арналған негіздер заңға тәуелді деңгейде көзделгені анықталды.

Анықтама ретінде: 120 мемлекеттік көрсетілетін қызмет бойынша мемлекеттік қызметтерді көрсетуден бас тартуға арналған негіздер 86 заңға тәуелді нормативтік құқықтық актілер мен ҚР Президентінің актілерінде айқындалған.

Бұл ретте, 182 мемлекеттік көрсетілетін қызмет бойынша мемлекеттік қызметтерді көрсетуден бас тарту үшін негіздер ҚР заңдары деңгейінде белгіленген.

Осыған орай, Заң жобасы мемлекеттік қызметтерді көрсетуден Қазақстан Республикасының заңдары деңгейінде ғана бас тарту бойынша нақты тәртіпті белгілеуге бағытталған.

#### **4-слайд**

Осы Заң жобасымен «Мемлекеттік көрсетілетін қызметтер туралы» Заңға өзгерістер енгізілуде.

**Біріншіден**, көрсетілетін қызметті берушілердің мемлекеттік қызметтерді көрсетуден бас тартуы жөніндегі қызметтерін нақты регламенттеу үшін белгілі бір мемлекеттік көрсетілетін қызметті алу құқығы жоқ болғандықтан, көрсетілетін қызметті алушыға қызметті көрсетуден бас тартуды білдіретін «мемлекеттік қызметті көрсетуден бас тарту» деген жаңа ұғым енгізіледі.

**Екіншіден**, ерекше бас тартуларды қоспағанда, мемлекеттік қызметтерді көрсетуден бас тартуға арналған негіздердің алуан түрлілігін оларды бір нұсқаға келтіруге және реттеу мәндері бойынша олардың тізімін біріздендіру жолымен жоюға бағытталған мемлекеттік қызметтер көрсетуден бас тарту негіздерінің біріздендірілген тізбесі белгіленеді (**5-слайдта** көрсетілген).

Анықтама ретінде: Заң жобасында көзделген мемлекеттік қызметтер көрсетуден бас тартудың біріздендірілген негіздерінің тізбесі:

1) көрсетілетін қызметті алушының мемлекеттік көрсетілетін қызметті алу үшін ұсынған құжаттарының және/немесе оларда қамтылған деректердің (мәліметтердің) дұрыс еместігін анықтау;

2) көрсетілетін қызметті алушының және/немесе мемлекеттік қызметті көрсету үшін қажетті, ұсынылған материалдардың, объектілердің, деректердің және мәліметтердің біліктілік талаптарына және/немесе Қазақстан Республикасының нормативтік құқықтық актілерінде белгіленген өзге де талаптарға сәйкес келмеуі;

3) уәкілетті мемлекеттік органның мемлекеттік қызметті көрсету үшін қажетті келісімі туралы сұрау салуға берілген теріс жауап, сондай-ақ сараптаманың, зерттеудің, тексерудің теріс қорытындысы;

4) көрсетілетін қызметті алушыға белгілі бір мемлекеттік көрсетілетін қызметті алуын талап ететін жекелеген қызмет түрлерімен айналысуға тыйым салатын, заңды күшіне енген сот үкімінің оған қатысты қолданысы;

5) заңды күшіне енген сот үкімі негізінде белгілі бір құқықтан айырылған немесе мемлекеттік көрсетілетін қызметті алумен байланысты белгілі бір құқығы шектелген көрсетілетін қызметті алушыға қатысты іс-қимыл;

6) уәкілетті мемлекеттік органның консультациялық-кеңесші органның ұсынымдары негізінде, сондай-ақ конкурс (емтихан, тестілеу) нәтижелері бойынша шешімдер қабылдауы.

## **6-слайд**

**Үшіншіден**, мемлекеттік қызметтер көрсетудің қолданыстағы практикасы «Мемлекеттік көрсетілетін қызметтер туралы» Заңның жекелеген нормаларын жетілдіру қажеттігін анықтады, атап айтқанда:

Мемлекеттік көрсетілетін қызметтер тізіліміне қосу күнінен бастап мемлекеттік көрсетілетін қызметтің стандарты мен регламентін әзірлеу мерзімдерін нақтылау бойынша;

көрсетілетін қызметті берушінің мемлекеттік қызметті көрсетуіне қажетті ақпаратты алу үшін мемлекеттік органдарға жіберілетін сұрау салулардың орындалу мерзімдерін белгілеу бойынша нормалар.

Бұл ретте, «Рұқсаттар және хабарламалар туралы» Заңның 41-бабы 1-тармағының нормалары жоғарыда аталған тәсілге сәйкестендірілген, оған сәйкес екінші санаттағы рұқсатты беруден бас тарту Қазақстан Республикасының заңдарында көзделген негіздер бойынша жүзеге асырылады.

Анықтама ретінде: «Рұқсаттар және хабарламалар туралы» ҚРЗ 41-бабы 1-тармағының қолданыстағы редакциясы: «Екінші санаттағы рұқсатты беруден бас тарту нормативтік құқықтық актілерде көзделген негіздер бойынша жүзеге асырылады.».

Қазіргі уақытта Мемлекеттік көрсетілетін қызметтер тізіліміне екінші санаттағы 217 рұқсат енгізілген.

## **7-слайд**

Сонымен қатар, аталған Заң жобасының шеңберінде «Өсімдіктерді қорғау туралы», «Геодезия мен картография туралы», «Қазақстан Республикасының мемлекеттік шекарасы туралы» ҚР Заңдарына түзетулер енгізіледі.

Аталған түзетулерді енгізу біріздендірілген негіздер қатарына кірмейтін, өсімдіктерді қорғау, геодезия және картография, Мемлекеттік шекараны қорғау саласындағы тиісті мемлекеттік қызметтерді көрсетуден бас тартудың ерекше негіздерінің болуына байланысты.

## **8-слайд**

Осылайша, Заң жобасын қабылдау қазіргі қоғам мен азаматтың талаптарына сәйкес келетін деңгейде мемлекеттік басқару жүйесінің құрамдас бөлігі ретінде мемлекеттік қызметтер көрсетудің сапасын арттыруға алып келеді және әлеуметтік-экономикалық, құқықтық теріс салдарды тудырмайды.

**Назарларыңызға рахмет!**